

Perisa, Pagisa alu-alukan pelantikan naib canselor UMS

4B 19.6.2017 A2

KOTA KINABALU: Persatuan Iranun Sabah (Perisa) menyifatkan pelantikan Profesor Dr D Kamarudin D Mudin sebagai naib canselor Universiti

Malaysia Sabah (UMS) amat bertepatan dan yakin beliau mampu mengangkat universiti itu ke mercu yang lebih cemerlang di peringkat global dan antarabangsa.

Setiausaha Agung Perisa Hassan Aris berkata pelantikan Kamarudin yang juga anak jati Kota Belud pertama dilantik menerajui universiti awam di negara ini diharap memberi sumbangan yang signifikan dalam memartabatkan UMS dan meningkatkan kualiti pendidikan di negara ini.

Pelantikan beliau itu memberikan makna yang cukup besar kepada warga Kota Belud dan menjadi satu cabaran bagi mereka untuk terus

meningkatkan kecemerlangan dalam pendidikan.

Sehubungan itu, Perisa di bawah pimpinan Datuk Almudin Kaida menyeru agar masyarakat khususnya generasi baru mengambil peluang bersaing dan menunjukkan keupayaan mereka untuk memasuki univrsiti.

Kamarudin adalah naib canselor UMS yang kelima menggantikan Prof Datuk Dr Mohd Harun Abdullah. Sebelum ini, beliau adalah timbalan naib canselor (Akademik dan Antarabangsa)

UMS. Beliau memiliki kepakaran dalam bidang Anesthdesiolgy dan terkenal sebagai pakar bius Sabah yang pertama.

Sebelum itu, beliau pernah menyandang jawatan Dekan Fakulti Perubatan dan Sains Kesihatan. Beliau menyertai UMS pada tahun 2004 setelah berkhidmat selama 12 tahun di Hospital Queen Elizabeth sebagai pakar bius.

Sementara itu, dalam satu kenyataan berasingan, Persatuan Graduan Iranun Sabah (Pagisa) turut mengalu-alukan pelantikan Kamarudin

naib canselor UMS yang baru berkuatkuasa 18 Jun.

Presiden Pagisa Razak Haji Rakunman yakin kepimpinan Kamarudin mampu menaikkan citra UMS di persada dunia pendidikan tanahair.

Bagaimanapun, beliau menggesa agar jumlah anak Sabah yang memegang jawatan dekan, timbalan ketua dekan dan pengarah di UMS dan sebagainya diperbanyakkan lagi.

Katanya anak-anak Sabah yang layak perlu diberi peluang mengurus UMS dan diberi jawatan seperti

naib canselor, timbalan naib canselor, dekan, timbalan dekan dan sebagainya.

Menurutnya naib canselor yang baru itu mempunyai tanggungjawab yang besar untuk melonjakkan lagi nama UMS di peringkat global.

Razak juga mengucapkan penghargaan kepada Kerajaan Negeri khususnya di bawah kepimpinan Ketua Menteri Datuk Seri Panglima Musa Haji Aman kerana memainkan peranan dan mengambil bahagian bagi memastikan UMS terus diterajui oleh anak Sabah sendiri.